
Prezidentni internetda haqoratlaganlik hamda ommaviy tartibsizliklarga da'vat qilganlik uchun jinoiy javobgarlik belgilandi

30.03.2021 yildagi «O'zbekiston Respublikasining ayrim qonun hujjatlariga o'zgartish va qo'shimchalar kiritish to'g'risida»gi O'RQ-679-son Qonuni qabul qilindi. Unga ko'ra JKning 158- «O'zbekiston Respublikasi Prezidentiga tajovuz qilish» moddasiga kiritilgan normaga muvofiq telekommunikatsiya tarmoqlaridan yoki Internet butunjahon axborot tarmog'idan foydalangan holda O'zbekiston Respublikasi Prezidentini haqoratlash va unga tuhmat qilish:

3 yilgacha ozodlikni cheklash yoki 2 yildan 5 yilgacha ozodlikdan mahrum qilish;

yoxud 5 yilgacha ozodlikdan mahrum qilish bilan jazolanadi.

JKning 244-«Ommaviy tartibsizliklar» moddasiga kiritilgan normaga muvofiq ommaviy tartibsizliklarga va fuqarolarga nisbatan zo'rvonlik qilishga omma oldida da'vat qilganlik uchun quyidagi jazo choralari qo'llaniladi:

100 BHMdan 300 BHMgacha miqdorda jarima yoki 2 yilgacha axloq tuzatish ishlari;

yoxud 3 yildan 5 yilgacha ozodlikni cheklash yoki 3 yildan 5 yilgacha ozodlikdan mahrum qilish.

Ushbu harakatlar bir guruh shaxslar tomonidan oldindan til biriktirib, OAVdan, telekommunikatsiya tarmoqlaridan, Internet jahon axborot tarmog'idan, shuningdek matnni ko'paytirishning bosma yoki boshqa usullaridan foydalangan holda sodir etilgan bo'lsa:

300 BHMdan 400 BHMgacha miqdorda jarima yoki 2 yildan 3 yilgacha axloq tuzatish ishlari;

yoxud 5 yildan 10 yilgacha ozodlikdan mahrum qilish bilan jazolanadi.

MJK 2011-«Qonunchilik hujjatlarini bajarmaslikka yoki buzishga omma oldida da'vat qilish» deb nomlangan modda bilan to'ldirildi. Respublikaning qonunchilik hujjatlari talablarini jamoat tartibiga va jamoat xavfsizligiga tahdid soladigan tarzda bajarmaslikka yoki buzishga, shu jumladan OAVdan, telekommunikatsiya tarmoqlaridan, Internet jahon axborot tarmog'idan, shuningdek matnni ko'paytirishning bosma yoki boshqa usullaridan foydalangan holda omma oldida da'vat qilish 60 BHMdan 80 BHMgacha miqdorda jarima solishga sabab bo'ladi.

Shuningdek 11.12.2003 yildagi «Axborotlashtirish to'g'risida»gi O'RQ-560-II-son Qonunning 121-moddasiga (Hamma erkin foydalanishi mumkin bo'lgan axborotni Internet jahon axborot tarmog'ida tarqatish) o'zgartirishlar kiritildi. Veb-saytning va (yoki) veb-sayt sahifasining yoxud boshqa axborot resursining egasi, shu jumladan bloger hamma erkin foydalanishi mumkin bo'lgan axborot joylashtiriladigan Internet jahon axborot tarmog'idagi o'z veb-saytidan va (yoki) veb-sayt sahifasidan yoxud boshqa axborot resursidan quyidagi maqsadlarda foydalanilishiga yo'l qo'ymasligi lozim:

ommaviy tartibsizliklarga, fuqarolarga nisbatan zo'rvonlik qilishga, shuningdek belgilangan tartibni buzgan holda o'tkaziladigan yig'ilishlar, mitinglarda, ko'cha yurishlarida va namoyishlarda ishtirok etishga da'vat qilish, shuningdek mazkur noqonuniy harakatlarni muvofiqlashtirish;

jamoat tartibiga yoki xavfsizligiga tahdid soluvchi yolg'on axborot tarqatish;

jamiyatga, davlatga davlat ramzlariga hurmatsizlikni namoyon etuvchi, shu jumladan beodoblik bilan ifodalangan axborotni tarqatish;

pornografiyani, zo'rvonlikni va shafqatsizlikni tarqib qilish, shuningdek o'z joniga qasb qilishga da'vat etish;

fuqarolarni, shu jumladan voyaga yetmagan shaxslarni ularning hayotiga va (yoki) sog'lig'iga yoxud o'zga shaxslarning hayotiga va (yoki) sog'lig'iga tahdid soluvchi g'ayriqonuniy harakatlarni sodir etishga undashga yoki boshqa tarzda jalb qilishga qaratilgan axborotni tarqatish.

Farg`ona viloyat sudining sudyasi

B.Ergashev

Jinoyat ishlari bo`yicha

Beshariq tuman sudining raisi

F.Sobirov

2021-04-23 13:43:23